

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ՔՈՒԷՅՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 345, Ուրբաթ, 05 Օգոստոս, 2016

ՀԱՅԿԱԿԱՆ

ՀԱՄԱ-ՀՄԸՄ-ական Խմբապետական 7-րդ Համագումարի Բացում

ՀՄԸՄ-ի Կեդրոնական վարչութեան նախաձեռնութեամբ 27-էն 31 Յուլիս 2016 տեղի կ'ունենայ Համա-ՀՄԸՄ-ական Խմբապետական 7-րդ համագումարը Երեւանի մէջ:

Համագումարին, որուն բացումը տեղի ունեցաւ 27 Յուլիսին, կը մասնակցին 18 երկիրներէ 28 բարձրաստիճան Խմբապետներ, ինչպէս նաեւ Հայ մշակութային «Արարատ» կազմակերպութեան Խմբապետը: Համագումարին կը մասնակցին նաեւ երկու օժանդակ



Խմբապետներ:

Համագումարին բացումը տեղի ունեցաւ չորեքշաբթի, 27 Յուլիս 2016-ի յետմիջօրէի ժամը 4:00-ին, «Կովկաս» պանդոկին մէջ: Ներկայ էին ՀՄԸՄ-ի Կեդրոնական վարչութեան անդամ եղբայրներ Գառնիկ Մկրտիչեան, Վաչէ Նաճարեան, Բագրատ Եսայեան, Օշին Փիրումեան եւ Անդո Պահարեան: Իր սրտի խօսքին մէջ Գառնիկ Մկրտիչեան հրաւիրեց ժողովը մէկ վայրկեան յոտնկայս լռութեամբ յարգելու յիշատակը առյաւեո բաժնուած ՀՄԸՄ-ական քոյրերուն եւ եղբայրներուն, ինչպէս նաեւ յիշատակը Լիզպոնի նահատակներուն, որոնց նահատակութեան օրը զուգադիպած էր Խմբապետական համագումարի բացման: Ան նաեւ շեշտեց համագումարին կարեւորութիւնը՝ նշելով, որ միութիւնը ակնկալիքներ ունի սկստական բարձրաստիճան այս համագումարէն:

Ապա, Կեդրոնական վարչութեան անդամ Վաչէ Նաճարեան մասնակիցներուն ներկայացուց համագումարին ծրագիրն ու աշխատանքներու ընթացքը՝ նշելով, որ օրակարգերը պիտի քննարկեն միութիւնը յուզող զանազան հարցեր եւ ապագայի պատկերացումներ: ՀՄԸՄ-ՀԱՄԿ-ի վարչութեան կողմէ բարի գալուստ մաղթեց Պերճ Թիւֆէնքճեան՝ յաջողութիւն մաղթելով համագումարի աշխատանքներուն:

Համագումարը հինգ օրերու ընթացքին վերատեսութեան պիտի ենթարկէ սկաուտական բոլոր կարգերու գիտելիքները եւ անոնց գործադրութեան եղանակը: Նաեւ պիտի մշակէ դաստիարակչական ծրագիրներ, պիտի զբաղի շրջաններու խմբապետներու վերաորակաւորման ծրագիրներով եւ պիտի պատրաստէ Համա-ՀՄԸՄ-ական 11-րդ բանակումի նախաձեռնութիւնը, որ ծրագրուած է իրագործել միութեան 100-ամեակին՝ 2018-ին:

Համագումարը յատուկ օրակարգով պիտի արձարծէ նաեւ ՀՄԸՄ-ի 100-ամեակի ձեռնարկներուն առաջարկները, ինչպէս նաեւ պիտի անդրադառնայ այժմեական հրատապ այլ հարցերու:

Այցելութիւններ

Նոյն օրը առաւօտեան, համագումարի մասնակից քոյրերն ու եղբայրները այցելեցին Հայաստանի Հանրապետութեան սփիւռքի նախարարութիւն, ուր իրենց դիմաւորեց սփիւռքի փոխնախարար Սերժ Սրապիոնեան: Փոխնախարարը իր ողջոյնի խօսքին մէջ նշեց, որ «խմբապետները իրենց տունը այցելած են այսօր եւ պատիւ է մեզի համար ձեզ այստեղ դիմաւորելը»:

Սրապիոնեան ընդգծեց ՀՄԸՄ-ի կարեւորութիւնը եւ ըսաւ, թէ ան հնոց միութիւնն է, որ կը դաստիարակէ հայեր: Ապա ան անդրադարձաւ ՀՄԸՄ-ի Կեդրոնական վարչութեան եւ սփիւռքի նախարարութեան միջեւ կնքուած յուշագիրին, որ ատելի կ'ամրապնդէ փոխադարձ գործակցութիւնը:

ՀՄԸՄ-ի Կեդրոնական վարչութեան ատենապետ Գառնիկ Մկրտիչեան նշեց, որ «ՀՄԸՄ-ը սփիւռքի մէկ մասնիկն է, եւ երբ տակաւին ազատ ու անկախ Հայաստան չկար, ՀՄԸՄ սփիւռքի մէջ կը խորհրդանշէր երիտասարդութեան եւ մարմնակրթութեան նախարարութիւնը»: Ապա ան համագումարի յուշանուէրը փոխանցեց նախարարի տեղակալին:



Ապա, խմբապետական համագումարի մասնակիցները, ՀՄԸՄ-ի Կեդրոնական վարչութեան անդամներուն ընկերակցութեամբ, ուղղուեցան Ծիծեռնակաբերդ՝ յարգանքի տուրք մատուցելու Հայոց ցեղասպանութեան զոհերու յիշատակին: Համագումարին անունով ծաղկեպսակ գետեղուեցաւ, նաեւ մեխակներ՝ իւրաքանչիւր մասնակիցի կողմէ: Կատարուեցաւ Տէրունական աղօթք, ապա մասնակիցներուն կողմէ հնչեց «Յառաջ նահատակ» քայլերգը:

Նախագահ Սերժ Սարգսյանի Ռուսիա Կ'այցելէ

«Արմէնփրես» կը հաղորդէ, թէ Հայաստանի նախագահ Սերժ Սարգսյան 10 Օգոստոսին աշխատանքային այցելութիւն պիտի տայ Ռուսիա:

Այս մասին տեղեկութիւն փոխանցած են նախագահի աշխատակազմի հասարակութեան եւ տեղեկատուութեան միջոցներու հետ կապերու վարչութենէն: Այցելութեան ծիրին մէջ նախագահ Սարգսյան Մոսկուայի մէջ հանդիպում պիտի ունենայ Ռուսիոյ նախագահ Վլատիմիր Փութինի հետ: Բարձր մակարդակի բանակցութիւններուն ընթացքին նախատեսուած է քննարկել ռազմավարական գործընկեր երկու պետութիւններուն միջեւ շարք մը մարզերու մէջ՝ քաղաքական, առեւտրատնտեսական, մարդասիրական, երկկողմանի փոխադարձ գործակցութեան օրակարգի առանցքային հարցեր, ինչպէս նաեւ եւրասիական տարածքին մէջ համարկման հոլովոյթներու զարգացման վերաբերող հարցեր:

Նախագահներ Սերժ Սարգսյանն ու Վլատիմիր Փութինը միտքեր պիտի փոխանակեն նաեւ միջազգային եւ շրջանային շարք մը ժամանակակից խնդիրներու շուրջ:

«Մասնայ Ծոեր» Խումբին Աջակիցները Հանրահաւաք Եւ Երթ Կազմակերպեցին Երեւանի Մէջ

«Մասնայ Ծոեր» խումբին աջակիցները հանրահաւաքի հրաւիրած էին Ազատութեան հրապարակին վրայ: Հանրահաւաքէն ետք մասնակիցները երթով ուղղուեցան դէպի նախագահական նստավայր: Այդտեղ անոնք վանկարկեցին «Մասնայ Ծոեր» խումբի անդամներուն անունները, հնչեցուցին իրենց պահանջները՝ ազատ արձակել քաղաքական բանտարկեալները, ոչ մէկ զիջում Ղարաբաղի հարցով:

Երթը իր ասարտին հասաւ Ազատութեան հրապարակին վրայ:

Արման Թաթոյեան Երեւանի Դէպքերուն Գծով Կ'ակնկալէ Բազմակողմանի Եւ Առարկայական Քննութիւն



Հայաստանի Մարդու իրաւունքներու պաշտպանի գրասենեակը հրապարակած է Արման Թաթոյեանի դիրքորոշումը՝ Երեւանի մէջ 17-31 Յուլիսին տեղի ունեցած իրադարձութիւններուն առնչութեամբ նախաքննութեան մարմիններուն մէջ գործերու քննութեան վերաբերեալ:

Մարդու իրաւունքներու պաշտպանը յայտարարած է, որ կը վերահաստատէ իր դիրքորոշումը այն մասին, որ այդ գործերով անհրաժեշտ է ապահովել բազմակողմանի, ամբողջական եւ առարկայական քննութիւն՝ առաւելագոյն թափանցիկութեան եւ հաշուետուողականութեան պայմաններու մէջ:

Թաթոյեան հաստատած է, որ իր լիազօրութիւններու սահմաններուն մէջ հետեւողական պիտի ըլլայ, որպէսզի արդիւնաւէտ քննութիւն կատարուի եւ իր ընդգծած չափանիշները յարգուին այդ հոլովոյթին մէջ:

Ոստիկանապետը Յանձնարարած Է Յայտնաբերել Սարի Թաղի Դէպքերը Հրահրած Քաղաքացիները

Հայաստանի ոստիկանութեան պետ Վլատիմիր Գասպարեան գործադիր ծառայութիւններու ղեկավարներուն յանձնարարած է յայտնաբերել 29-30 Յուլիսին Սարի թաղի միջադէպին մասնակից քաղաքացիները, որոնք սաղրած են բախումները եւ բռնութիւն գործադրած են հաւաքի մասնակիցներուն, լրագրողներուն եւ ոստիկաններուն նկատմամբ:



Հայաստանի ոստիկանութեան հասարակութեան հետ կապերու եւ լրատուութեան վարչութենէն յայտնած են, որ ոստիկանութեան պետ Վլատիմիր Գասպարեանի յանձնարարականով վերոնշեալ դէպքերուն առնչութեամբ ոստիկանութեան ներքին անվտանգութեան վարչութեան կողմէ սկսած են ծառայողական քննութիւններ՝ թէ՛ ոստիկաններուն կողմէ անհամաչափ ուժ բանեցնելու եւ թէ՛ զանգուածային լրատուամիջոցներու ներկայացուցիչներուն նկատմամբ բռնութիւն գործադրելու եւ անոնց սարքերը կոտրելու դէպքերով:

Փաստաբանները Կը Պնդեն, Որ Իրենց Պաշտպանեալները Կ'ենթարկուին Քաղաքական Հետապնդման



Զանգուածային անկարգութիւններ կազմակերպելու մեղադրանքով 2 Օգոստոսին կալանաւորուած քաղաքական գործիչներու պաշտպանները 3 Օգոստոսին յայտարարած են, որ զանգուածային անկարգութիւններ կազմակերպելու մեղադրանքով կալանաւորուած գործիչներուն նկատմամբ կը կատարուի ոչ թէ իրաւական, այլ քաղաքական հետապնդում: Այս մասին կը գրէ Արտակ Համբարձումեան:

Փաստաբաններուն համաձայն, այդ հետապնդումին նպատակն է կարելիութիւն չտալ, որ իրենք բողոքի քայլեր կազմակերպեն:

«Քննչական մարմինները այսօր կը շարունակեն նոյն մարտիմէկեան ձեռագիրը, քաղաքական բանտարկեալներու նկատմամբ մեղադրանքները կ'առաջադրուին նոյն սկզբունքով», յայտնած է Ժառանգութիւն կուսակցութեան անդամ Յովսէփ Խուրշուդեանի փաստաբան Սեդա Սաֆարեան:

Իսկ Հիմնադիր խորհրդարանի անդամ Կարօ Եղնուկեանի պաշտպան Տիգրան Հայրապետեան ղիտել տուած է. «Այսպիսի մեղադրանքները ուղղակի մէկ նպատակ ունին, որպէսզի անոնք չշարունակեն հաւաքներ կազմակերպել եւ այլն»:

29 Յուլիսին Սարի թաղի մեջ զանգուածային անկարգություններ կազմակերպելու մեղադրանքով կալանաւորուած Ժառանգութիւն կուսակցութեան փոխնախագահ Արմէն Մարտիրոսեանի պաշտպան Գիւրի Յովհաննիսեան ըսած է, որ կալանաւորուած կատարուած է միայն ոստիկաններուն ցուցմունքներուն հիման վրայ եւ որեւէ այլ ապացոյց չէ ներկայացուած:

Ապացոյցներու բացակայութեան մասին խօսած է նաեւ Դաւիթ Սանասարեանի փաստաբան Ռոպերթ Ռեւազեան՝ նշելով, որ Սանասարեան ձերբակալուած է հիւանդանոցէն եւ հիմա ալ առողջական մտահոգիչ խնդիրներ ունի:

Ժառանգութիւն կուսակցութեան նախկին բանբեր Յովսէփ Խուրշուդեան երկու ոստիկաններու ցուցմունքի հիման վրայ կը մեղադրուի ոստիկաններուն ուղղութեամբ քար նետելու յանցանքով: Անոր փաստաբանը՝ Սեդա Սաֆարեան, յիշեցուցած է, որ միջազգային կառոյցները բազմիցս դատապարտած են Հայաստանը՝ միայն ոստիկաններուն վկայութեամբ մեղադրանքներ առաջադրելու գործելաոճին համար:

Հիմնադիր խորհրդարանի անդամ Կարօ Եղնուկեանի փաստաբան Տիգրան Հայրապետեան նշած է, որ զինուած խումբին աջակցելու մեղադրանքով կալանաւորուած իր պաշտպանեալին կը սպառնայ մինչեւ 20 տարուան բանտարկութիւն: Ըստ Հայրապետեանի, Եղնուկեան կը մեղադրուի 4 դրուագով, որ բոլորն ալ, ըստ փաստաբանին, յանցագործութիւններ պէտք չէ նկատել:

Բոլոր փաստաբաններն ալ ըսած են, որ պիտի բողոքարկեն կալանաւորումներու որոշումները՝ ընդհուպ մինչեւ Եւրոպական դատարան:

Լեռնային Ղարաբաղի Սահմանադրական Բարեփոխումներուն Կ'առաջարկուի Նախագահական Կառավարման Ձեւ

Լեռնային Ղարաբաղի մեջ սահմանադրական բարեփոխումներու հայեցակարգով կ'առաջարկուի նախագահական կառավարման ձեւ:

Լեռնային Ղարաբաղի նախագահին կից սահմանադրական բարեփոխումներու մասնագիտական յանձնախումբին կողմէ 30 Յուլիսին նախագահին ներկայացուած սահմանադրական բարեփոխումներու հայեցակարգը բաղկացած է նախաբանէ, մարդու եւ քաղաքացիի հիմնական իրաւունքներն ու ազատութիւնները, կառավարման համակարգը, դատական իշխանութիւնը, տեղական ինքնակառավարումը եւ հանրաքուէ բաժիններէն:

Ներկայացուած հայեցակարգին, մասնաւորապէս կառավարման համակարգի տարբերակին նկատմամբ հանրային հետաքրքրութիւնը նկատի ունենալով, մասնագիտական յանձնախումբին կողմէ առաջարկուած է նախագահական կառավարման ձեւ:

Հանրապետութեան նախագահին կողմէ հաւանութեան արժանանալու պարագային, մասնագիտական յանձնախումբը պիտի շարունակէ աշխատանքները՝ սահմանադրական բարեփոխումներու նախագիծին վրայ:

Պաշտօնանկություններ Ու Պաշտօնէ Հրաժարումներ՝ Հայաստանի Մէջ

4 Օգոստոսին տարբեր մակարդակներու վրայ պաշտօնանկություններու եւ պաշտօնէ հրաժարումներու մասին լուրեր հրապարակուեցան:

Հայաստանի գլխաւոր դատախազ Գեորգ Կոստանեան առողջական խնդիրներու պատճառով դիմած է Հայաստանի նախագահին՝ խնդրելով ընդունիլ Հայաստանի գլխաւոր դատախազի պաշտօնէն զերծ կացուցուելու վերաբերեալ իր դիմումը:

4 Օգոստոսին Դիմատետրի իր էջին վրայ այս մասին գրած է գլխաւոր դատախազի մամլոյ քարտուղար Քրիստինէ Մելքոնեան.

«Յարգելի՛ գործընկերներ, կը տեղեկացնեմ, որ այսօր Հայաստանի գլխաւոր դատախազութեան կեդրոնին մէջ տեղի ունեցած է աշխատակազմի նիստ, որ վարած է Հայաստանի գլխաւոր դատախազ Գեորգ Կոստանեանը: Հայաստանի գլխաւոր դատախազը աշխատակազմի անդամներուն տեղեկացուցած է, որ առողջական խնդիրներու պատճառով դիմած է Հայաստանի նախագահին՝ խնդրելով ընդունիլ գլխաւոր դատախազի պաշտօնէն ազատ կացուցուելու վերաբերեալ իր դիմումը: Գլխաւոր դատախազ Գեորգ Կոստանեան նաեւ տեղեկացուց, որ նախագահին կողմէ դիմումը ընդունուած է եւ ինքը 4 Օգոստոս 2016-էն սկսեալ վար կը դնէ Հայաստանի գլխաւոր դատախազի իր լիազօրութիւնները»:

Նոյն օրը հրապարակուած հրամանագիրով Հայաստանի նախագահ Սերժ Սարգսեան Հրանդ Եպիսկոպոսեանը ազատ կացուցած է կառավարութեան առընթեր Ազգային անվտանգութեան ծառայութեան տնօրէնի առաջին տեղակալի պաշտօնէն: Հրամանագիրին մէջ նշուած է. «Ղեկավարուելով 2005 թուականի փոփոխութիւններով Հայաստանի Հանրապետութեան Սահմանադրութեան 55-րդ յօդուածի 5-րդ կէտով եւ հիմք ընդունելով «Ազգային անվտանգութեան մարմիններուն մէջ ծառայութեան մասին» Հայաստանի Հանրապետութեան օրէնքի 18-րդ յօդուածի 2-րդ մասը՝ կ'որոշեմ Հրանդ Եպիսկոպոսեանը ազատ կացուցել Հայաստանի Հանրապետութեան կառավարութեան առընթեր Ազգային անվտանգութեան ծառայութեան տնօրէնի առաջին տեղակալի պաշտօնէն»:

Նախագահ Սարգսեանի այլ հրամանագիրով մը, այդ պաշտօնին վրայ նշանակուած է Կարապետ Դաւթեան:

Միւս կողմէ, Հայաստանի Ազգային անվտանգութեան ծառայութեան քննչական վարչութեան պետ Մնացական Մարութեան եւս ազատ կացուցուած է իր պաշտօնէն: Այս մասին յայտնած է Ազգային անվտանգութեան ծառայութեան մամլոյ կեդրոնի պետ Սամսոն Գալստեանը՝ նշելով, որ Մնացական Մարութեան թոշակի անցած է:

Ազգային անվտանգութեան ծառայութեան քննչական վարչութեան պետ նշանակուած է վարչութեան պետի առաջին տեղակալ Միքայէլ Համբարձումեան: Այլ տեղեկատուութեամբ մը ոստիկանութեան լրատուական ծառայութեան «Ազատութիւն» ձայնասփիւռի կայանին յայտնած են, որ Հայաստանի ոստիկանապետ Վլաստիմիր Գասպարեանի 4 Օգոստոսի հրամանով պաշտօնէ արձակուած է ոստիկանութեան Նոր Նորքի բաժնի ղեկավար Արմէն Վաթեանը: Ոստիկանութիւնը տեղեկութիւն չէ հաղորդած պաշտօնանկութեան պատճառներուն մասին:

ՄԻՋԱԶԳԱՅԻՆ

«Թեհրան Կրնայ Վերսկսիլ Իրանիումի Հարստացման Ծրագիրին» Կ' ըստ Նեմաթի

ԹԱՍՍ լրատու գործակալությունը կը հաղորդէ, որ Իրանի խորհրդարանի նախագահի բանբեր Պեհրուզ Նեմաթի «Փրես Թի.Վի.»-էն յայտարարած է, որ Իրան կրնայ իրանիումի աւելի բարձր մակարդակով հարստացման ծրագիրին վերսկսիլ, եթէ Միացեալ Նահանգներ շարունակեն խուսափիլ հիւլէական ծրագրի շուրջ համաձայնագիրով իրենց ստանձնած պարտաւորութիւններու կատարումէն:



«Գործողութիւններու միացեալ համապարփակ ծրագիրը ամբողջական ծրագիր է, եւ եթէ Միացեալ Նահանգներ զայն չկատարեն, ապա մենք պիտի արձագանգենք համապատասխան կերպով: Միացեալ Նահանգներու պաշտօնատարները կը յայտարարեն իրենց պարտաւորութիւններու կատարման մասին, սակայն անոնց խօսքերը կը տարբերին գործերէն: Հիւլէական համաձայնագրի գործադրութեան սկսելու ժամանակէն աւելի քան վեց ամիս անցած է, սակայն մեծ դրամատուները ձեռնպահ կը մնան ատոր կէտերուն կատարումէն, միայն փոքր դրամատուները Իրանի հետ սահմանափակ ելեւտական գործառնութիւններ կը կատարեն», նշած է Նեմաթին:

Ան յոյս յայտնած է, որ «5+1» խմբակը (Միացեալ Նահանգներ, Ռուսիա, Չինաստան, Բրիտանիա, Ֆրանսա+ Գերմանիա) ամէն պարագայի պիտի կատարէ միացեալ ծրագրի ծիրին մէջ իրենց ստանձնած պարտաւորութիւնները:

Մինչ այդ, Միացալ Նահանգներու արտաքին գործոց նախարարութիւնը հակադարձեց այաթոլլա Ալի Խամենէիին խօսքին՝ նշելով, որ հիւլէական թղթածրարին վերաբերեալ համաձայնութիւնը վստահութեան վրայ չէ կառուցուած:

Նախարարութեան բանբեր Ճոն Քըրպի ըսաւ. «Անիկա երբեք վստահութիւն չէ ենթադրած: Ենթադրած է ստուգում, համաձայնագրի կէտերու կատարման ստուգման շատ խիստ կանոնակարգ»:

Ըստ Քըրպիի, Թեհրան եւ համաձայնագրի միւս մասնակիցները կը կատարեն իրենց պարտականութիւնները, եւ ինչպէս ինք յոյս ունի, պիտի շարունակեն կատարել զանոնք:

1 Օգոստոսին Խամենէի յայտարարած էր, որ անցեալ տարի Իրանի եւ «5+1»-ի միջեւ կնքուած համաձայնագիրը դարձած է հերթական ապացոյց, թէ «թշնամիներուն կարելի չէ վստահիլ»:

«Ոչ մէկ պարագայի կարելի է թշնամիներուն վստահիլ: Ատոր հերթական օրինակը եւ համոզիչ ապացոյցը դարձաւ Գործողութիւններու միացեալ համապարփակ ծրագիրը: Այսօր, նոյնիսկ այն դիւանագէտները, որոնք մասնակցած են բանակցութիւններուն, կ'ընդունին իրականութիւնը, այսինքն այն, որ Միացեալ Նահանգներ չեն կատարեր իրենց ստանձնած յանձնառութիւնները», նշած էր ան:

www.armenianprelacykw.com

Քլինթոնը Իր Ժողովրդականությանը 8 Կէտով Գերազանցած Է Թրամփը

«Ռոյթըրթ» լրատու գործակալության եւ «Իփսոս» ընկերության կատարած միացեալ հարցախոյզը ցոյց կու տայ, որ Միացեալ Նահանգներու նախագահութեան Դեմոկրատական կուսակցութեան թեկնածու Հիլըրի Քլինթոնը իր ժողովրդականության ցուցանիշով աւելցուցած է հանրապետական իր մրցակիցին՝ Տոնալտ Թրամփի նկատմամբ իր առաւելութիւնը:

Նոր հարցախոյզին համաձայն, հաւանական ընտրողներու 43 առ հարիւրը պատրաստ է քուէարկելու ի նպաստ Քլինթոնի, 35 առ հարիւրը՝ Թրամփի, իսկ 9 առ հարիւրը՝ այլ թեկնածուներու:

Հարցախոյզը կատարուած է 28 Յուլիսէն մինչեւ 1 Օգոստոս, եւ անոր մասնակցած են Միացեալ Նահանգներու 1289 քաղաքացիներ, որոնք յայտարարած են, որ պիտի մասնակցին քուէարկութեան:

Այսպիսով, Քլինթոնը Թրամփէն յառաջ անցած է ութ տոկոսային կէտով: 29 Յուլիսին կատարուած «Ռոյթըրթ-Իփսոս»-ի նախորդ հարցախոյզին մէջ այդ առաւելութիւնը վեց առ հարիւր էր:

Նշենք, որ Միացեալ Նահանգներու նախագահական ընտրութիւնները տեղի պիտի ունենան 8 նոյեմբերին:

«Ուաշինկթըն Սուրիոյ Մէջ Զինուորական Լուծումի Զգոյութեան Կը Հաւատայ» Կ'ըսէ Թոնըրը



Միացեալ Նահանգներու արտաքին գործոց նախարարութեան բանբեր Մարք Թոնըրը յայտարարեց, որ «Ուաշինկթըն Սուրիոյ մէջ զինուորական լուծումի չգոյութեան կը հաւատայ»՝ աւելցնելով, որ անհրաժեշտ է Սուրիոյ մէջ մարտական գործողութիւններու դադրեցման ճամբով հասնիլ քաղաքական փոխանցման հոլովոյթի մը:


Թոնըրը յայտարարեց. «Սուրիոյ մէջ Միացեալ Նահանգներու նպատակը թշնամական գործողութիւններու դադրեցման վերականգնումն է եւ չափաւորական ընդդիմութեան հետ գործելը»:

Ան Սուրիոյ կառավարութիւնը ամբաստանեց «վերջին շրջանին զինադադարները խախտելու» յանցանքով՝ նշելով, որ Ուաշինկթընի եւ Մոսկուայի միջեւ սուրիական թղթածրարին շուրջ տեղի ունեցած են քննարկումներ, սակայն համաձայնութիւններ չեն գոյացած, այլ՝ քաղաքական լուծումի հասնելու համար քաղաքական փոխադարձ հասկացողութեան հասնելու փորձեր կատարուած են:

Թոնըրը նշեց, որ Միացեալ Նահանգներ տեղեակ չէր Հալէպի դէմ յարձակում գործելու եւ քաղաքայինները շրջափակելու Ռուսիոյ ծրագիրներէն: Ռուսիոյ արտաքին գործոց փոխնախարար Սերկէյ Ռիապքով Զորեքշաքթի օր յայտարարեց. «Ռուսիա Հալէպի դէմ յարձակում կամ օդային հարուածներ չի ծրագրեր»:

ԱԿՆԱՐԿ

Յաղթահարելով Անգորութեան Չգացումը



- Անին մանչուկ մը ծնաւ,- աւետեց Նայիրին այս առաւօտ՝ մէկ անգամէն փոխելով տրամադրութիւնս:
- Բարի եկաւ ան մեր աշխարհը,- եղաւ առաջին հակազդեցութիւնս:
- Այո՛, բարի եկաւ մեր այս խենթ աշխարհը,- սրբագրեց Նայիրին:

Արդարեւ, այս խենթ աշխարհը նուազ խենթ տեսնելու յոյսն է անպայման, որ նոր բնակիչով մը հարստացնելու կը մղէ Անիներն ու Նայիրիները, որ լաւատեսութեամբ նային դէպի ապագան: Դէպի մեր, մանաւանդ իրե՛նց ապագան:

Եթէ չըլլա՛ր այդ յոյսը...

Այս առաւօտ, ամեն օրուան պէս, որեւէ ուրիշ բան ընելէ առաջ, համակարգիչս բացի ստուգելու համար Հայաստանի լուրերը: Ահա երկու շաբաթ է Վեր այդ լուրերը միայն մտահոգութիւն կը պատճառեն մեզի: Եւ այսօր, Յուլիս 30-ին, յուսահատութիւն մը պատեց զիս: Վերջ չէր գտած պատանդառութիւնը, կը շարունակուէին ցոյցերն ու ձերբակալութիւնները, լուծում մը չէր գտնուած տակաւին՝ առանց արիւնահեղութեան դուրս գալու համար այս տագնապէն:

- Այդ գաղափարէն պէտք է հրաժարիլ,- ըսաւ ընկերս վերջերս. - Ինչո՞ւ կը վախնանք արիւնահեղութենէ: Ամէն երկրի մէջ մարդկային զոհեր կ'ըլլան, ինչո՞ւ մեր քով պիտի չըլլան, մենք ալ ի վերջոյ բնական ժողովուրդ մը չե՛նք: Համաձայն չեմ «մէկ ազգ»-ի գաղափարին: Դասակարգեր կան ու դասակարգային պայքարին մէջ արիւնահեղութիւն ալ պիտի ըլլայ: Սակայն հարց է, թէ այսօր դասակարգային պայքարով ո՞ր երկիրը կրնայ իր խնդիրները լուծել, այսօր՝ դրամատիրութեան բացարձակ իշխանութեան թաթին տակ: Խնդիրներ, որոնք առկայ են այսպէս կոչուած ամէնէն յառաջացած երկիրներուն մէջ անգամ, ուր յանցագործ խումբերն ու երկրին հարստութիւնը իրենց ձեռքը պահող չնչին փոքրամասնութիւնը «արեւ ու անձրեւ կ'ընեն»: Ներկայ ժամանակներուն մարդկային ու ազգային իրաւունքներու պաշտպանութեան համար ուրիշ զենքերու չե՞, որ պէտք ունինք:

Այս խօսքերը վստահաբար դիւրութեամբ չեն ըսուիր, նաեւ դիւրութեամբ չեն լսուիր, մանաւանդ որ «այս խենթ աշխարհ»-ին մէջ այսօր արիւնահեղութիւնը այնքան սովորական երեւոյթի վերածուէր է, որ կարծես իբրեւ մարդ չենք ալ ազդուիր այդ բոլորէն, բացի երբ մեր անմիջական շրջապատին մէջ կատարուին անոնք:

Իսկ մեզի համար, որքան ալ ֆիզիքապէս հեռու ըլլանք անկէ, «անմիջական շրջապատ»-ը մեր հայրենիքն է, որուն իւրաքանչիւր բնակիչի կեանքը սուղ է, պահպանուելիք է, գուրգուրալի է, հայրենիքի՛ն համար է պէտք, թէկուզ ամենէն անբաղձալի անձին պատկանի անիկա: Գէթ ա՛յս է իմ համոզումը, մե՛ր համոզումը, եւ չեմ կարծեր, որ այսօր որեւէ ազգային կազմակերպութիւն կայ, որ այդպէս չմտածէ, մանաւանդ որ այդ կեանքերը մէկ առ մէկ մեզմէ խլել կը փորձէ թշնամին անընդհատ: Այս մօտեցումը, որքան ալ անբացատրելի թուի, կրնայ մեզի՛ յատուկ երեւոյթ ըլլալ, ու թերեւս եթէ մենք բարոք լուծումը գտնենք մեր ներկայ տագնապին, օրինակ կարենանք հանդիսանալ նաեւ ուրիշներու: Կ՛երագե՛մ միթէ:

Բնականաբար ինծի պէս շատերն են մտահոգ, ինչպէս կ՛երեւի համացանցին վրայ շրջող փոխանակութիւններէն՝ ել-նամակներէն ու զանազան տեսանիւթերէն: Դժբախտաբար բոլորին պարագային ալ վերջ ի վերջոյ կայ յուսահատութեան վտանգը. այդ բոլորին դիմաց՝ բան մը փոխելու անկարողութեան, անզօրութեան զգացումի օր ըստ օրէ ամրակայումը մեր հոգիներուն մէջ: «Սփիւռքը բան մը պէտք է ընէ, մեր կուսակցութիւնները պէտք է միջամտեն, լուծում մը գտնեն», կ՛ըսեն ոմանք: Ուրիշներ ալ մեր հայրենի ժողովուրդին եւ իշխանութիւններուն բարոյական դասեր տալու տրամադրութիւններ կը ցուցաբերեն, յաճախ շատ բանէ անտեղեակ եւ առանց նկատի առնելու մշակութային, կենցաղային այն հսկայ վիհը, որ մեզ իրարմէ կը բաժնէ տակաւին, եւ որ վերանկախացման ահա այս 25 տարիներուն դեռեւս բաւական խորունկ կը մնայ:

Ճիշդ է, հաւաքական թէ անհատական ճիգերով այդ վիհը լեցնելու, վերցնելու շատ փորձ եղաւ ու պիտի ըլլայ տակաւին: Բայց բաւարար չէ, մեծ արդիւնքներու չէ հասած տակաւին: Միւս կողմէ, չէ՛ մշակուած համազգային վերականգման ծրագիր մը, որուն համաձայն հունաւորութիւն այդ բոլոր ճիգերը, գտնուին աւելի՛ արդիւնաւէտ միջոցներ Հայաստանը վերածելու այն երկրին, որ երագեր ենք տեսարար, եւ որ միշտ պատրանք է թուեր մեզի, այնպէս՝ ինչպէս միշտ մեր աչքին առջեւ՝ «կապոյտ միրաժ» է եղեր Արարատը, ինչպէս գրեր է Սիլվա Կապուտիկեան ատենին: Որպէսզի պարզապէս օդատեսիլ չըլլայ Հայաստանը մեզի համար, մեր օգնութիւնը աւելի՛ շօշափելի պէտք է ըլլայ, աւելի՛ ամբողջական, աւելի՛ համապարփակ՝ թէ՛ տնտեսական առումով եւ թէ՛ բազմաթիւ այլ առումներով, բայց մանաւանդ՝ տնտեսական:

Կարելոք է սակայն, որ փրկիչի երեւոյթ չառնենք, դասատուի ձեւեր չառնենք, ամենագէտ չերեւինք: Մեր մտապատկերները պարտադրելու տրամադրութիւններ ցոյց չտանք:

– Անին մանչուկ մը ծնաւ...

Հայաստանի ապագայ զինուոր մը ծնաւ:

Յաղթահարենք անզօրութեան ամէն զգացում:

ՎՐԷԺ ԱՐՄԷՆ

www.aztagdaily.com

ԼՈՒՐԵՐ ԳՍՂՈՒԹՆԵՐԷՆ

Տոլմայի Աւանդական Փառատոն՝ Թիֆլիսի Մէջ

«Արմէնփրես» լրատու գործակալութիւնը կը հաղորդէ, որ Վրաստանի հայ կիներու «Շուշանիկ» միութեան նախաձեռնութեամբ, վիրահայոց թեմի առաջնորդարանի, «Հայարտուն» կեդրոնի եւ անհատ բարերարներու աջակցութեամբ, 10 Յուլիսին Թիֆլիսի Ս. Էջմիածին եկեղեցւոյ բակին մէջ տեղի ունեցած է հայկական ազգային կարեկրատեսակի՝ տոլմայի փառատոն-մրցումը: Այս մասին տեղեկացուցած է վիրահայոց թեմը՝ աւելցնելով. «Լաւ աւանդութիւն դարձած է Վրաստանի ազգային միւս արժէքներուն հետ միասին ներկայացնել նաեւ հայկական խոհանոցը իր բազմազանութեամբ, որ հայոց բազմադարեան մշակոյթի անբաժան մասն է: Այս տարի «Տոլմա 2016» փառատոն-մրցումին մասնակցութեան ցանկութիւն յայտնած էին ոչ միայն «Շուշանիկ» միութեան անդամները, այլ նաեւ՝ Վրաստանի մէջ Հայաստանի Հանրապետութեան դեսպանութիւնը, «Վրաստան» եւ «Ալիքմետիա» մայրենի լեզուով լրատուամիջոցները, թիւ 104 հայկական դպրոցը, հասարակական կազմակերպութիւններ, մշակութային համայնքներ, Թիֆլիսի մէջ գործող քանի մը ճաշարաններ ու սրճարաններ եւ բազում տնային տնտեսուհիներ, թիւով՝ 37 մասնակից»:

Մեղաններուն վրայ շարուած էին գեղեցիկ ձեւաւորուած 45 կաթաւներ՝ հայկական տոլմայի տարատեսակներով: «Փառատոն-2016»-ի մասնակիցներուն խոհարարական հմտութիւնը գնահատելու համար ձեռնարկին կազմակերպիչներուն հրաւերով Թիֆլիս մեկնած էր հայ խոհարարական աւանդութիւններու զարգացման եւ պահպանման հասարակական կազմակերպութեան նախագահ Սեդրակ Մամուլեան՝ կազմակերպութեան անդամներ Գարիկ Գեորգեանի, Գրիշա Անտինեանի, Արմէն Թեֆելեանի եւ Ախթալայի քաղաքապետ Հայկ Խաչիկեանի ընկերակցութեամբ:



Փառատոնին պատուոյ հիւրն էր Հայաստանի Հանրապետութեան վաստակաւոր արուեստագիտուհի, ծնունդով թիֆլիսցի Լէյլա Սարիբեկեան:

Վրաստանի հայ կիներու «Շուշանիկ» միութեան նախագահ Սուսաննա Խաչատրեան ողջունելով մասնակիցներն ու ներկաները՝ փառատոն-մրցումը յայտարարեց բացուած: Վիրահայոց թեմի առաջնորդ Վազգէն եպս. Մերգանխանեան եւ թեմակալ առաջնորդի օգնական Խորէն վրդ. Յովհաննիսեան օրհնեցին տոլմայով լի կաթսաները եւ բարեյաջող ընթացք մաղթեցին փառատոնին:

Հայոց հինաւորց եկեղեցւոյ բակը լեփ-լեցուն էր մարդոցմով. եկած էին տեղացիներ եւ բազմաթիւ հիւրեր՝ հայեր, վրացիներ, ռուսեր եւ արտասահմանցիներ: Տոլմայի համտեսումը կ'ընթանար ուրախ համերգով, զոր կը վարէին թեմի մշակոյթի բաժանմունքի տնօրէն Լեւոն Զիդիլեան եւ մենակատար-երգչուհի Աննա Պօղոսովա-Բաղալեան:

«Տոլմա 2016» փառատոն-մրցումը հայրենասիրական եւ ազգային երգերու անգուգական կատարումներով ողջունեց արուեստագիտուհի Լէլլա Սարիբեկեան՝ արժանանալով ներկաներուն բուռն ծափահարութիւններուն:

Հինգ հոգիէ բաղկացած հեղինակաւոր դատական կազմը՝ Հայաստանի գլխաւոր խոհարար Սեդրակ Մամուլեանի գլխաւորութեամբ, համի, ձեւաւորման եւ մտայղացման անուանակարգերու մրցանակներ շնորհեց «Կալանդա» ճաշարանին, «Կրեքօ օթել» ճաշարանին, Ս. Էջմիածին Եկեղեցոյ Եկեղեցասէր կիներու միութեան անդամ Քնարիկ Ոսկանեանին, իսկ «Կրան փրի» մրցանակին արժանացաւ «Մանկալ-հաուզ Թիֆլիս» ճաշարանը:

ՀՄԸՄ-ի Դամասկոսի Մասնաճիւղի Սկաուտական Խորհրդաժողով



Հայ մարմնակրթական ընդհանուր միութեան առաքելութիւնը լաւագոյնս յառաջ տանելու եւ գիտակից հայ սերունդներ պատրաստելու միտումով, ՀՄԸՄ-ի Սուրիոյ Շրջանային վարչութիւնը կազմակերպեց Դամասկոսի մասնաճիւղի սկաուտական խորհրդաժողով՝ ներկայութեամբ Սուրիոյ Շրջանային վարչութեան ներկայացուցիչ Գէորգ Գալեմքերեանի, ուրբաթ, 15 Յուլիս 2016-ի երեկոյեան ժամը 9:00-ին, Դամասկոսի «Ա. Ահարոն-եան» կեդրոնի «Տիգրան Ստեփանեան» սրահին մէջ:

Մասնակցութեամբ ՀՄԸՄ-ի Դամասկոսի մասնաճիւղի վարչութեան, Սկաուտական խորհուրդին, երեց ՀՄԸՄ-ականներու, որոնք ՀՄԸՄ-ի շարքերուն մէջ եղած են խմբապետ, աքելլա, վարչական եւ սկաուտական խորհուրդի անդամ, ինչպէս նաեւ՝ «Ա. Ահարոնեան» կեդրոնի ներկայացուցիչին: Խորհրդաժողովի բացումը կատարեց մասնաճիւղի ատենապետ Աւօ Աճեմեան: Այնուհետեւ ան հրաւիրեց խորհրդաժողովը ղեկավարող Գէորգ Գալեմքերեանը ներկայացնելու ժողովին նպատակը: Ան Շրջանային վարչութեան գնահատանքը յայտնեց մասնաճիւղի քոյր-եղբայրներուն՝ իրենց հետեւողական եւ բժախնդիր աշխատանքին համար, ապա նշեց խորհրդաժողովին նպատակը՝ ՀՄԸՄ-ի Դամասկոսի մասնաճիւղի վարչութեան եւ Սկաուտական խորհուրդին տարած գանազան աշխատանքները արժեւորել եւ համագործակցութեան ոգիով գործնական որոշումներ տալ, ի խնդիր ՀՄԸՄ-ի պայծառացման:

Մասնաճիւղի ատենադպիր Սօսի Քիւրտեան մասնակից քոյր-եղբայրներուն ներկայացուց հնգամսեայ ամփոփ տեղեկագիրը՝ մատնանշելով վարչութեան դիմագրաւած դժուարութիւնները, որոնք խորհրդաժողովին քննարկումի հիմնական կէտերը հանդիսացան, եւ այդ բոլորը յաղթահարելու համար շինիչ առաջարկներ ներկայացուցան՝ հայ նորահաս սերունդներուն լաւագոյնս դաստիարակելու եւ զանոնք հայկական առողջ միջավայրի մէջ պահելու առնչութեամբ:

Խորհրդաժողովը փակուեցաւ «Յառա՛ջ, նահատակ» քայլերգով:

Հայաստանի Անկախության 25-ամեակին Նուիրուած Ձեռնարկին



Նախաձեռնութեամբ Չինաստանի մէջ Հայաստանի դեսպանութեան, վերջերս Հայաստանի անկախութեան 25-ամեակին նուիրուած ձեռնարկներու ծիրին մէջ, Փեքինի «Ճինթայ» արուեստի թանգարանին մէջ տեղի ունեցաւ հայաստանցի գեղանկարիչ Ալեքսանդր Դերոյեանի

գեղանկարչական աշխատանքներու ցուցահանդէսը:

Բացման խօսքով հանդէս եկաւ Հայաստանի դեսպան Ս. Մանասարեան, որ ամփոփ կէտերու մէջ ներկայացուց Հայաստանի անկախութեան տարիներու անցած ճանապարհը՝ կարեւոր նկատելով երկու երկրներուն միջեւ մշակութային փոխհամագործակցութիւնը: Դեսպանը նկատել տուաւ, որ Հայաստանի անկախութեան 25-ամեակին առիթով տեղի ունեցած ձեռնարկները առիթ են չին արուեստասէր հասարակութեան ներկայացնելու հայկական գեղարուեստը:

Փրոֆ. Գրիգոր Երզնկացեան Արժանացաւ Իրլանտայի Վիրաբուծութեան Թագաւորական Քոլեճի Բարձրագոյն Պարգէտին



Իր բազմամեայ գործունէութեան եւ վիրաբուծութեան ծիրէն ներս մեծ ներդրում ունենալուն համար մարդասէր եւ բարերար փրոֆ. Գրիգոր Երզնկացեան արժանացաւ Իրլանտայի վիրաբուծութեան թագաւորական քոլեճի բարձրագոյն պարգէտին՝ պատուաւոր անդամի կոչումին:

Երզնկացեան իր կեանքը նուիրած է արեւելեան, կեղրոնական եւ հարաւային Ափրիկէի մէջ բժշկութեան մարզի զարգացման, վիրաբուծութեան ուսուցման, որակեալ մասնագէտներ պատրաստելու եւ իր մասնագիտական փորձը անոնց փոխանցելու աշխատանքին: Ան հեղինակ է ափրիկեան վիրաբուծութեան վերաբերեալ մեծ թուով աշխատութիւններու:


Արեւելեան, կեղրոնական եւ հարաւային Ափրիկէի վիրաբուծութեան համալսարանի (ԱԿՀԱՎՀ) նկատմամբ իր ունեցած ներդրումին եւ նուիրումին պատճառով համալսարանը արձանագրած է բազմաթիւ յաջողութիւններ ու նուաճումներ: Իր մեծ վաստակին եւ ներդրումին համար 2012 թուականին ան արժանացած է ԱԿՀԱՎՀ պատուաւոր անդամի կոչումին:

2007-ին ԱԿՀԱՎՀ-ի եւ Իրլանտայի վիրաբուծութեան թագաւորական քոլեճին միջեւ սկսաւ համագործակցութիւն, որուն մէջ մեծ է դերը փրոֆ. Երզնկացեանի:

Փրոֆ. Երզնկացեան պարպերաբար կ'այցելէ Հայաստան վիրաբուժական եւ բարեգործական գործունէութեան նպատակներով:

ԱՅԼԱԶԱՆ

Վարդուհի Խաչատրեան



Անցեալ ամիս Երեւանի մէջ «Կոմիտաս» մետալով պարգեւատրուեցաւ ժընէի «Կրանտ» օփերայի մեներգչուհի եւ եօթը միջազգային մրցոյթներու դափնեկիր Վարդուհի Խաչատրեանը:

Հետեւեալ խօսքերով կը ներկայացնէ ինքինք անուանի երգչուհին.

«Ծնած եմ Երեւան, մեծցած եմ երաժշտական մթնոլորտի մէջ, երաժշտական բարձրագոյն կրթութիւնս ստացած եմ Երեւանի մէջ: Առաջին մեծ յաջողութիւնս 1996-ին Լիեժի մէջ (Պելճիքա) վոքալիսթներու մրցոյթին տարած յաղթանակս եղած է, որուն հետագային յաջորդեցին բազմաթիւ յաղթանակներ եւ մրցանակներ: Հայաստանի մէջ, որպէս տարուան լաւագոյն երգչուհի, 2004-ին արժանացած եմ

«Արտաւազդ» մրցանակին: Բազմաթիւ հրաւերներ ստացած եւ երգած եմ աշխարհի տարբեր բեմերու վրայ՝ համագործակցելով հանրայայտ բազմաթիւ երգիչներու, իմբավարներու եւ երաժիշտներու հետ, բազմաթիւ մենահամերգներ տուած եմ աշխարհի շատ մը քաղաքներու մէջ: Կ'երգեմ եօթը լեզուներով: 2007-էն ի վեր կը բնակիմ եւ կ'աշխատիմ ժընէի մէջ:

Կոմիտասի երգերուն եւ մշակումներուն ծանօթացած եմ մանուկ հասակէս՝ լսելով հայրիկիս անզուգական կատարումները: Իմ բոլոր մենահամերգներուս ծրագիրները կ'ընդգրկեն Կոմիտասի վոքալ ստեղծագործութիւնները, որոնք ներկայացուցած եմ Եւրոպացի հանդիսատեսներուն: Նարեկացին, Կոմիտաս, Եկմալեան, Բաբաջանեան եւ հայ այլ երաժշտահաններու ստեղծագործութիւնները եւս ներկայացուցած եմ միջազգային փառատօններու ժամանակ: 2010-ին լոյս տեսաւ իմ՝ «Կոմիտասի յիշատակին» ձայնասկաւառակս, որ կ'ընդգրկէ Կոմիտասի քնարական երգերու շարքը:

Ժընէի մէջ ստեղծած եմ հայ-գուիցերիական մշակութային կազմակերպութիւնը՝ «Աւետիս»-ը, որուն նպատակը Եւրոպացի հանդիսատեսին հայ երաժիշտներուն եւ երաժիշտ-կատարողներուն հետ ծանօթացնելն է, հայկական երաժշտութիւնն ու արուեստը Եւրոպայի մէջ տարածելը եւ Եւրոպայի մէջ ճանաչում ստանալու համար հայ տաղանդաւոր երիտասարդներուն, արուեստագէտներուն աջակցիլը: 2015-ին «Աւետիս»-ը Հայոց ցեղասպանութեան նուիրուած երեք մեծ ձեռնարկ կազմակերպեց ժընէի հանրայայտ սրահներուն մէջ:

Շուտով պիտի մեկնիմ Իտալիա, ուր Օգոստոս 11, 12-ին «Այտա» օփերային մէջ հանդէս պիտի գամ Ամներիսի դերով:

Շատ յուզուած եւ ուրախ եմ, որ հայրենիքիս մէջ «Կոմիտաս» մետալով պարգևատրուեցայ: Բազմաթիւ մրցանակներու արժանացած եմ, բայց այս մէկը շատ թանկ է ինծի համար: Ես միշտ կ'երգեմ՝ առանց որեւէ պարգևի ակնկալիք ունենալու, սակայն պէտք է խոստովանիմ, որ հաճելի է նման վերաբերմունքի, ուշադրութեան արժանանալը:

Հայաստանէն հետո պիտի տանիմ շատ բան՝ արեւ, ժպիտ, անսահման ջերմութիւն, նաեւ՝ անհանգստութիւն... Ես կը կարօտնամ ինծի հարազատ մարդիկը, Երևանի՝ ծանօթ եւ բազում յոյզեր, յիշողութիւններ արթնցնող փողոցները, եկեղեցիները... օր մը անպայման պիտի վերադառնամ այնտեղ, ուրկէ սկսած եմ իմ մեծ ճանապարհի սկիզբը:

16 տարիէ կ'ապրիմ դուրսը, սակայն հոգիով ու սրտով միշտ ներսն եմ՝ իմ Հայաստանին մէջ»:

Ի՞նչ Կը Պատահի Ծխախոտը Դադրեցնելէ Ետք

Գիտե՞ք, թէ ծխախոտի վերջին գլանիկը մարելէ 20 վայրկեան ետք արդէն իսկ հրաշալի եւ մանաւանդ օգտակար բաներ կը կատարուին մեր մարմնին մէջ: Ահա թէ ի՞նչ...

- Առաջին փոփոխութիւնը կը սկսի ծխելը դադրեցնելէ 20 վայրկեան ետք: Այսպէս, կը վերականգնի արեան շրջազայտութիւնը եւ կ'աւելնայ ձեռքերու եւ ոտքերու մատներուն զգայնութիւնը:
- Արդէն 8 ժամ ետք կը բարեկարգուի թթուածինին մակարդակը՝ արեան մէջ:
- Երկու օր ետք մարմնէն կը հեռանան նիքոթինի մնացորդները:
- Դարձեալ 2 օր ետք կը վերականգնի համային զգացողութիւնը:
- Երկու օր ետք նաեւ կը վերականգնի հոտարութեան զգացողութիւնը:
- Երեք օր ետք կը վերականգնի շնչառութիւնը:
- Մէկ շաբաթ ետք կը նուազի արեան ճնշումը:
- Երկու շաբաթ ետք կը թեթեւայ հազը: Անիկա անմիջապէս չ'անհետանար, քանի որ թոքերը ժամանակի կը կարօտին վերականգնելու եւ մաքրուելու համար:
- Երեք ամիս ետք յստակօրէն կը բարելաւուի դէմքի մորթին որակն ու գոյնը:
- Մէկ տարի ետք կը բարեփոխուի ակռաներուն գոյնը:
- Տասնհինգ տարի ետք քաղցկեղի հաւանականութիւնը կը հաւասարի չճիտող անձի հաւանականութեան ցուցանիշին:



Տան Մէջ Բորբոսին Պատճառած Անհանգստութիւնները

Բորբոսը ոչ միայն կը փճացնէ պատերու եւ առաստաղի արտաքին տեսքը, այլեւ պատճառ կը դառնայ զանազան հիւանդութիւններու: Բորբոսին պատճառը բարձր խոնաւութիւնն է. անոր առաջին իսկ հետքերը պէտք չէ անտարբեր ձգեն մեզ, պէտք է անմիջապէս մաքրենք, չքացնենք զայն:

Ահա թէ ինչ անհանգստութիւններ կը պատճառէ տան մէջ առկայ բորբոսը.

- 1.- Յոգնածութիւն եւ տկարութիւն,
- 2.- Գլխացաւ,
- 3.- Մնայուն հազ,
- 4.- Յիշողութեան խախտում,
- 5.- Յօդացաւ,
- 6.- Փորի ցաւ,
- 7.- Մորթային գերզգայնութիւն,
- 8.- Տեսողութեան խանգարում,
- 9.- Տրամադրութեան վերիվայրում,
- 10.- Բերնի մէջ մետաղի համի տարօրինակ զգացում:



Հայաստանը Լաւագոյն Դիրքը Գրաւեց Մանկական Նկարներու Ցուցահանդէսին



Վերջերս Փեքինի մէջ տեղի ունեցաւ Երեխաներու պաշտպանութեան միջազգային օրուան նուիրուած «Ամբողջ աշխարհի երեխաներու բարեկամութիւնը» խորագիրը կրող մանուկներու նկարներու միջազգային ցուցահանդէսին բացումը:

Ցուցահանդէսին ներկայացուած էին աւելի քան 500 մանկական աշխատանքներ, որոնք կ'արժարժէին բարեկամութիւն եւ խաղաղութիւն, պայծառ սպազան ու բոլոր մանուկներու երջանիկ ու անհոգ

մանկութիւնը:

Ցուցահանդէսին իր մասնակցութիւնը բերաւ Երեւանէն փոքրիկն Մարինէն, որուն աշխատանքը նկատուեցաւ լաւագոյնը՝ դառնալով ցուցահանդէսի խորհրդանիշը: Ան ներկայացուցած էր աշխարհի ազգային դրօշները՝ որպէս հաստաբուն ծառի տերեւներ, որուն շուրջ կը պարէին տարբեր ազգերու պատկանող երեխաներ:

www.lragir.am